


CELEBRACIÓN EN OS COTOS

13-14 de xuño do 2026

XI SEMANA DO TEMPO ORDINARIO A



NON MÁIS
VIOLENCIA
DE XÉNERO



Os COTOS COA IGUALDADE VERDADEIRA DAS PERSOAS,
COS POBOS QUE SOFREN INXUSTIZA E ABANDONO,
COS REFUXIADOS E MARXINADOS DA SOCIEDADE,
COA NATUREZA MALTRATADA,

E SEMPRE SEMENTANDO PAZ



1.- ENCONTRO DA COMUNIDADE

(tod@s de pé)

@ monitor/a está na sé

SAÚDO DE BENVIDA

🎵 *nº 4 Amigos nas penas e na festa amigos*

Celebrante:

Benvidos sexamos todos a esta celebración. Reunímonos para compartir en comunidade a nosa fe no nome do Pai, do Fillo e do Espírito Santo.

Hoxe celebramos sabendo que Deus é un Deus que chama, un Deus que se achega, un Deus que conta con nós. Reunímonos no seu nome para compartir a fe, e a nosa resposta vai ser, como a dos discípulos, “aquí estamos Señor, podes contar con nós”, porque queremos facer crible o camiño do evanxeo.

Neste camiño, tanto para nós como para os discípulos, Xesús dá unhas instrucións moi concretas:

- * Haberá que aliviar o sufrimento, humanizar a vida e facer medrar a liberdade e a igualdade,
- * Haberá que levar o Evanxeo para dalo de balde,
- * Haberá que pregoalo cunha mensaxe de esperanza porque o Reino xa chega.

Se nós queremos de verdade ser discípulos de Xesús o que temos que facer é por en práctica estas recomendacións na nosa vida.

ACTO PENITENCIAL

Celebrante: *Somos hoxe nós os enviados a facer realidade o evanxeo. Xesús conta con nós, coas nosas palabras e sobre todo cos nosos feitos, pero as veces son outros os nosos camiños, por iso agora queremos pedir perdón:*

Monitor/a

- ✓ Pedimos perdón por ter feito da fe un feixe de rutinas, que nada teñen que ver coa vida, e mesmo cremos que podemos ser crentes non practicantes.

Perdón, Señor, perdón

- ✓ Pedimos perdón porque ás veces non estamos dispostos a renunciar a nada e facemos da vida un camiño cheo de egoísmos.

Perdón, Señor, perdón

- ✓ Pedimos perdón porque na nosa vida ás veces funcionamos dende as apariencias e o que dirán, e non damos nin somos exemplo de coherencia.

Perdón, Señor, perdón

Celebrante: *Deus Pai agarimoso ten piedade de nós e dos que teñen un lugar na nosa vida. A todos, o Señor, nos concede o perdón e nos leva á compartir a felicidade da vida eterna. Amén.*

ORACIÓN PROPIA DO DÍA

Celebrante: *Rematamos a primeira parte da celebración presentando no silencio o que rebule no noso interior. Facémolo doídos co sufrimento dos refuxiados, necesitados de paz, e coa satisfacción de saber que se conta e se pode contar coas nosas mans, como se contou coas dos discípulos.*

(Silenzio)

Celebrante:

Deus, Noso Pai,
miramos para o mundo e para a Igrexa de hoxe e descubrímoslos fráxiles,
e necesitados de mans sanadoras.

Fainos merecentes da misión que nos encomendas,
e dá remate, Ti, á obra das nosas mans.

Pedímoscho por Cristo, Noso Señor. Amén

2.- PROCLAMACIÓN DA PALABRA DE DEUS

(sentad@s) a palabra de Deus proclámase dende o ambón

Celebrante: *Escoitemos agora como a Palabra de Deus nos convida a facer da fe un camiño no que se pode contar coas nosas mans.*

Na primeira lectura Moisés diranos que Deus nos quere coma o seu pobo.

No evanxeo Xesús necesita dos discípulos. Chámaos e envíaos a anunciar a Boa Nova do Reino.

LECTURA DO LIBRO DO ÉXODO

Naquel tempo, cando chegaron ao deserto do Sinaí, acamparon alí, ao pé do monte. Moisés subiu ao encontro de Deus, e o Señor chamouno desde a montaña, para mandarlle dicir ao pobo:

- "Vistes como tratei aos exipcios, como vos levantei a vós sobre ás de aguia e vos acheguei a min. Se agora me obedecedes e gardades a miña alianza, seredes a miña propiedade escolleita entre todos os pobos, pois a terra é toda miña. Vós seredes para min un reino de sacerdotes, un pobo consagrado".

Palabra do Señor

🎵 *nº 7 Andarei na presenza do Señor* SALMO



PROCLAMACIÓN DO SANTO EVANXEO SEGUNDO MATEO

Daquela, vendo Xesús a multitude, sentiu unha fonda compaixón por ela, porque estaban todos derreados e esmorecidos coma ovellas sen pastor. Entón díxolles aos discípulos:

- A colleita é ben boa, pero os xornaleiros son poucos; así que rogádelle ao dono da colleita que mande xornaleiros.

E chamando aos discípulos elixiu aos doce apóstolos. Estes son os nomes: o primeiro Simón, chamado Pedro, e mais Andrés seu irmán, Santiago o do Zebedeo e mais Xoán seu irmán, Felipe e Bartolomeo, Tomé e Mateo, o recadador de impostos, Santiago o de Alfeo e mais Tadeo, Simón o Zelota e Xudas Iscariote.

A estes doce mandounos Xesús con estas instrucións:

- Non vaiades a terra de pagáns nin entredes en vilas de samaritanos; ide máis ben ás ovellas perdidas do pobo do Señor. E mentres camiñades proclamade que xa chega o Reino dos Ceos. Compartide cos enfermos, resucitade mortos, coidade leprosos, facede ben. E xa que de balde recibistes, dade de balde tamén.

Palabra do Señor

(sentad@s) gardamos uns instantes de silencio para acoller a palabra no corazón



Para pensar e ler a xeito de homilía

Xesús, que nos ensina hoxe?

** Primeiro ensina a ter unha mirada fonda para toda a humanidade. El sinte unha fonda compaixón con quen anda derreado e esmorecido. Nós, como miramos, nós de quen temos compaixón?.*

** O segundo que nos ensina hoxe Xesús é que El non ten que facelo todo. Precisa mans que estean dispostas a axudar. Conta cos doce apóstolos, e pode contar con nós. En que podemos dar unha man?*

** O terceiro que nos ensina hoxe Xesús é que é tarefa de todos humanizar a vida compartindo á beira dos enfermos, loitando por facer as cousas un chisco menos mal.*

** O cuarto e último que nos ensina hoxe Xesús é que o Evanxeo é para dalo de balde, pois de balde o recibimos.*

PROFESIÓN DA FE

Celebrante Neste encontro parroquial, escoitando a túa Palabra queremos comprometernos dando resposta da nosa fe. Dicimos:

♪ ***Creo, Señor, pero aumenta a miña fe***

Monitor/a:

***Cremos en Deus,
Pai e Nai de todos os homes e mulleres, que nos creou á súa imaxe e que nos convida a amar e a acoller dende a coherencia co evanxeo?***

♪ ***Creo, Señor, pero aumenta a miña fe***

***Cremos en Xesucristo,
que quixo compartir a vida sentíndose irmán con todos, especialmente cos máis derreados e esmorecidos?***

♪ ***Creo, Señor, pero aumenta a miña fe***

***Cremos no Espírito de Deus,
que nos dá forzas para dar unha man aos demais, como demostraron os apóstolos cando Xesús os enviou a anunciar o Evanxeo?.***

♪ ***Creo, Señor, pero aumenta a miña fe***

***Cremos na Igrexa,
comunidade na que todos somos necesarios para dar e ser exemplo de persoas cribles?***

♪ ***Creo, Señor, pero aumenta a miña fe***

ORACIÓN UNIVERSAL

Celebrante: *Oremos a Deus Pai, que se achega a nós e que nos convida a que como comunidade nos acordemos de cantos sofren. Oremos dicindo:*

Señor conta con nós

Monitor/a:

✓ Para doernos cos homes, mulleres, nenos e nenas que sofren as consecuencias da falta de pan e de paz. Oremos

✓ Para ser agradecidos con todas as persoas que viven estes días dando unha man a cantos buscan dignidade sabéndose refuxiados. Oremos

✓ Para que na comunidade de Os Cotos, sexa o compartir, e non o ter, o raseiro polo que medimos aos demais. Oremos

✓ Para que todos nós aprendamos que o amor e a solidariedade son desexo de Xesús para vencer as soidades, as desesperanzas e os fracasos. Oremos

✓ Para que o Papa, os bispos, os curas e todas as persoas que teñen responsabilidades na vida da Igrexa, fagan crible o evanxeo na coherencia e na gratuidade, facendo da terra a casa común. Oremos

Celebrante: *Escoitamos Pai as túas chamadas, escoita ti as oracións dos que en Ti confiamos. Por Xesucristo, noso Señor. Amén.*

3.- OS SIGNOS DA COMUÑÓN CON DEUS E COA COMUNIDADE

NOSO PAI

Celebrante: *Dirixámonos agora ao Deus que é Pai, deixémonos encher do seu amar, e con Xesús anunciémolo como aquel que nos chama e nos quere dando exemplo de evanxeo:*

NOSO PAI ...



SIGNO DA PAZ

Celebrante: *As nosas mans tendidas uns para os outros expresan a nosa vontade de ser coherentes nos feitos; con corazón de irmáns e irmás, na liberdade de procurar un mundo mellor, e na responsabilidade da fe, desexámonos o mellor na paz uns para os outros. Coma irmáns dámonos a paz.*



nº 38

Que medre a paz na nosa terra

COMUÑÓN

Celebrante: Deus Pai convidanos a camiñar con Cristo facendo da igrexa o fogar da comunidade que ten a responsabilidade de ser exemplo de evanxeo.

Ditosos nós por ser invitados a compartir coma comunidade este pan do Señor.

Señor, eu non son merecente de que entres no meu fogar, mais unha palabra túa abonda para me salvar

🎵 **nº 55 No colo da miña nai**

4.- AVISOS E DESPEDIDA

ORACIÓN FINAL

Celebrante: Señor, que o evanxeo que temos compartido, nos alente no esforzo por facer comunidade, nos anime a percorrer camiños de igualdade, nos empuxe a dar unha man aos necesitados e nos encha de forzas para superar as dificultades.

A vida ten sabor a Evanxeo cando nos preocupamos da xente que hoxe vive derreada e esmorecida.

A vida ten sabor a Evanxeo cando respondemos á chamada que Deus nos fai para que coma discípulos deamos unha man ao proxecto de fraternidade de Xesús.

A vida ten sabor a Evanxeo cando damos unha man dende a gratuidade, facendo ben sen esperar nada a cambio.

Avísase das misas (ver folla do mes)

*Que teñamos un bo día, unha boa semana,
e o Señor nos bendiga, † nos garde de todo mal
e nos leve ao seu fogar de vida eterna. Amén
Podémonos ir en paz. Deámoslle grazas a Deus*



*Xesús envía aos discípulos:
"Ide e pregoade o evanxeo!"*

Palabras de Xesús no evanxeo de hoxe

🎵 **nº 56 Ide e pregoade a Nova de Deus**